

«Bajegiar ensemen in pajais nov»

Il parlament catalan ha elegì in nov president del pajais

DA GUIU SOBIELA-CAANITZ

■ **Ils 10 da quest mais han 70 dals 135 commembras e commembers dal parlament da la Catalogna (7416 237 olmas) elegì in nov «President de la Generalitat», pia schef da la regenza catalana. I han tscherni il president communal da Girona (97 227 olmas). Il num da questa citad fa endament la claustra da Géronde a Sierre/VS.** Ma la schlatta dal nov president catalan è linguisticamain anc pli interessanta. El ha num Carles Puigdemont i Casamajó ed è naschì en il vitg d'Amer en las collinas enturn Girona. Il num da Puigdemont deriva da dus substantivs latins che pon valair sco sinonims – «Puig» da «podium» e «mont» da «mons, montis». Il pled «puigdemont», interpretà sco «puig d'amunt», muntass «culm da la vart sura», «culm survart». Co e pertge è il figl

dal pastizier d'Amer, maridà cun ina Rumena, vegnì parsura d'in pajais cun ina populaziun pli gronda che quella dal Danemarc?

La Spagna indeblida

L'atun 2015 avevan les elecziuns catalanas dà 72 mandats ad ina maioritad che leva ina Catalogna independenta. Aifer quella maioritad na leva la gruppa «Candidatura d'unitat popular» (CUP, 10 mandats) betg reelegir president Artur Mas i Gavarró: Ella al reproschava sia politica d'austeritad e la corrupziun da sia partida. Suenter mais da discussiuns ha Mas renunzià a reger, e las gruppas separatisticas han elegì Puigdemont president da la regenza. Lez, cun acceptar l'incumbensa, ha declarà: «Mia finamira è da negoziar ina ruptura civilisada cun il stadi spagnol, en colliaziun cun l'Uniun europeica e la cuminanza internaziu-

nala, (...) per bajegiar ensemen in pajais nov.» Retg Filip ha refusà da retschaiver la presidenta dal parlament catalan suenter l'elecziun da Puigdemont. Ma la regenza nova ha gia entschavì a pinar la separaziun. Favuravla è la flaiveltezza actuala da Madrid, tenor il motto irlandais da 1914: «England's difficulty is Ireland's opportunity.» Suenter las elecziuns spagnolas da december 2015 pari impussibel da furmar ina regenza «naziunala»; primminister Mariano Rajoy vegn lur a stuair bannir per matg elecziuns legislativas novas. Tiers vegn che l'impopularitad da la monarchia crescha: «Ins renfatscha a la sora da retg Filip sia cumplitad cun in delict da fraud fiscal. Ses process bitta ina glisch sin la corrupziun en il pajais (...). Il scandal (...) ha fatg in grond donn a la reputaziun da la monarchia» («NZZ» dals 12 da schaner 2016). Co va quai vinavant?